

棕亭詩鈔

棕亭詩鈔卷十二

全椒 金兆燕 鍾越

張看雲年七十將歸老震澤不復出門作自遣詩

三十首索和卽步其韻

名山歸去卧仍遊不負平生馬少游塵胃幾年原已滌
溪毛從此定堪羞夕陽松徑頻招鶴春水苔磯好繫舟
獨眺蒼烟無伴侶勝他人海作遨頭

幾載詩衢奉德輝忽傳歸興憶林扉行藏不畏樵夫笑
踪跡寧愁牧孺譏作賦有情同靖節著書無憤似韓非
空山他日相尋處雞黍前言定不違

半生風雨作梳篦身似流泉未守谿桃梗誰憐中路客
梅花空憶故山妻眼枯夜月方諸淚心碎春風杜宇啼
此日一帆歸計穩勞薪舊夢怯重提

五兩搖風喜乍晴江雲盡處曉烟生一峯遙黛杯中見
七尺孤桐膝上橫客路永拋心自豁家山遙望眼逾明
竹籬茅舍周遮處溪鳥林花倍有情

莫釐峯色望中微紙上烟雲腕底揮花影簾前紅似錦
湖光枕上碧成圍蕭涼疏水貧多樂拙樸妻孥老足依
不爲探梅重戴去無緣更着舊征衣

莫笑迂夫更釋迂性情本自異時趨湖山幸列神仙窟

翰墨聊成主客圖無事閉門惟蠟屐有花招客便携壺
胸中別具閒經畫籌略瓜田並芋區

扁舟江上採芙蓉一笛波心吼玉龍曠野波光收巨渚
空山風物近清冬平湖水落纔三尺老屋雲封更幾重
洞裏胡麻應有飯何妨白髮慶遭逢

粉堵茅檐一望新吟窩安樂貯閒身燒花汲水頻提甕
漉酒當風自墊巾村舍蒼烟沈日脚湖天白晝感雲鱗
洞庭山下觀垂釣誰似詹何獨繭綸

把臂何時許入林顛毛我亦雪霜侵漁村得酒盍辭醉
樵斧尋山不畏深壯志已銷三尺劍餘年好付一絃琴

獨憐送別津亭後憔悴秋園病不斟

杖履圖書足養真不須風物感蕭晨
難尋海上乘槎客且作山中拾穗人
放眼白鷗空浩蕩撫懷蒼石尚嶙峋
毛公壇上聞長嘯落日紛紛下野賓

空山寂寂夜沈沈孤月蒼厓揭萬尋
圓攝不離身口意靜觀堪証去來今
但求張邵爲深友不與山王更嗣音
應笑白頭癡老子茫茫抱膝感苔岑

蕭散林間折角巾荷衣穩稱野吟身
在乎山水之間也自謂羲皇以上人
花樹百弓皆淨業輪蹄半世總迷因
故鄉泉石多佳趣落紙揮毫倍有神

勝侶相過不待延雞豚村舍晚春天但逢澤友兼山友
便作茶仙更酒仙小艇每衝朝雨泛短簾自傍晚霞攀
灰堆打後呼如願收拾聰明肯再鞭

繞宅流泉不暫停空中琴筑自泠泠閑從野寺修簫譜
偶得山肴檢食經翠磴行攀千佛塔蒼崖坐擁萬花屏
烟村古渡無人處雲在遙天月在汀

柴門几杖更無塵北叟南翁笑語親園客餉賓無世味
畊夫識字亦天真燠寒自適裘兼葛貴賤何知玉與珉
草長鶯飛遲日好桃源別有洞中春

沽酒停帆問曲阿虔亭風雨飽經過春申浦上花初落

伍相祠前水自波新樣小生知姓少故家喬木感懷多
壯心已自銷除盡猶向樽前一放歌

還年老福頌王林麟脯堪羞雉可斟綠醕醲沽瓶滿眼
元靈香貯研凹心嵇康此日聊頽玉賈島他時定鑄金
讀畫評詩清課外更無塵事挂幽襟

遙山漠漠遠村微幾處平田水鶴飛人影穿林朝市散
歌聲出谷晚樵歸藤梢冒客常妨帽柳絮迎人故點衣
行到澄江如練處長吟應憶謝元暉

幽鳥翩翩舞翠衿緝蠻似和短長吟山看遠勢偏求淡
竹迓濃陰不厭深自有春和常潏盎任他秋氣各蕭森

五千文字皆糟粕獨對梅花見道心

詩才史筆擅三長久向文壇重老蒼世外定應逢若士
人間何處覓孫陽從教好夢依山靜猶厭孤雲出岫忙
一棹三高祠畔過水雲盡處是鱸鄉

偶然賦海擬張融積雪飛霜一望中旭日升時丹嶂麗
餘霞散後碧天空伺潮雞唱星河曙貫月槎迴島嶼通
極目蓬山真不遠半生應悔嘆途窮

平鋪一幅剡溪藤貌得名山似可登翰墨作緣聊自適
烟雲過眼總無憑高掀日窟君真健長嘯天梯我亦曾
瑤草耕烟猶未種乖龍無耳不堪乘

休言世事太紛紛，壯不如人我亦云。
休老只須謀白墮，談經莫更羨朱雲。
有情山鴈夢中喚，無隱木樨空際聞。
奕世仙曹良足貴，辭家難學小茅君。

來如冷月去如烟，枉結京塵粥飯緣。
小埵塵漂空蟻陣，淺池波靜亦魚天。
千帆戶外開頭過，一榻樓中枕手眠。
雨後秋瓜排五色，携鋤且問邵平田。

茫茫魏闕與江湖，幾度雙輪憶碾蒲。
但有敝衣隨野鶴，更無殘鳥效飛鳬。
膺門遍數誰堪掃，蔣徑猶存幸未蕪。
此日歸來老司馬，好局一室伴清娛。

倚徧垂虹壓浪亭，太湖西望獨開舲。
乾坤一粒何從納，

日月雙丸自不停春水漫漫羅隱宅寒宵耿耿伍喬星
詩瓢酒董隨身具劍閣瞿塘已慣經

小園苔逕繞平河短堦經年尚未葺市網收時寒渚靜
估帆開處夕陽多叢談胙史俱堪錄退谷杯湖未易過
下渙水田秧馬出村村腰鼓賽鳴鼉

種秫田荒且自耘老來生趣在微醺弓蛇杯底無憑影
衣狗天邊易散雲虛室不妨清似水靈臺休使熱如焚
山中麋鹿溪邊鳥舊侶從今不離羣

芙蓉千頃柳千株舊市人家酒易沽社友偶然携具到
鄰翁便可隔牆呼鳴橈極浦旋通越倚杖層巔更小吳

他日疏麻傳遠道定應有論似潛夫

培塿生平敢學山知交幸在紀羣間也知空谷頻招手
未免離亭各愴顏自挈烟霞歸嶺岫尚留詞賦動江關
丹崖青壁皆人境偶語何時草共班

新構樓亭初成與同人分賦

廣文官舍如蓬科數椽新構安樂窩繞屋花樹交枝柯
小亭容膝堪婆娑妻孥婢僕紛譏訶何異琢玉爲飛墻
傳舍寢食年豈多徒爲後人作巢窠遷官他日奈此何
安能車載兼馬馱先生但喜居有那此語勿聽姑言他
好友一室同吟哦軒牕晴日烘簾波斗酒且喜衰顏酡

安問頌禱哭與歌

又和張堯峯詩韻二首

草堂斷手莫嫌遲意匠經營我自知
好列琴書消永日敢期輪奐貢諛詞
一區且當身將隱百歲何須某在斯
牆屋旣成薪木好居然太樸未全漓

文游詞客盡周秦投贈詩篇欲等身
苜蓿開筵慚地主珠璣灑翰訝天人
頓教錦映庭前樹好倩紗籠壁上塵
莫惜草書入屏障張顛醉筆更如神

蔣清容四絃秋題詞三首

司馬住江州青衫淚自流祇今江上月
腸斷四絃秋

九派空留寒浪千秋誰訴幽襟才子原多軼事詞人最
肯傷心

笙歌鼎沸夜遲遲白髮當筵醉一卮解得琵琶夜深語
不應驚駭放楊枝

錢百泉自禾中來出示秋勝見懷之作並讀諸疊

韻詩勉效步韻一首兼寄秋勝

荒廢如寒筭滯澁類濕鼓寄身當夷庚肅客愁旁午成
蹊豈天桃無依仍秋杜安得手一編長晝自撻戶忽枉
故人作勝飲杯中酹慰勉周眠餐訊問及兒女冷齋益
春雲硯席頓溫煦況對俊流人詩圃集儕侶一吟醉一

觴觴至盍復數冰蠶本耐寒蓼蟲久習苦諄諄甘忍飢
文字足自嫵老夫拙言辭尺約難繼組曲踊百效三長
城字怯五君莫嘆遠遊吾亦非吾土

送窮和方介亭韻

終年嫌汝纏吾身欲送翻教意倍親面目恐難留故我
性情肯便效他人一朝乍別真奇事半世相隨也夙因
勝業坊中前路好荅堂休憶舊溪濱

除夜和江玉屏韻

雪禁寒梅未可尋殘詩祭罷且孤斟松盆燄燄春光到
蠟炬輝輝夜漸深花柳預期三月醉文章難稱百年心

歡娛博塞非吾事枯坐聊爲抱膝吟

元日和汪玉屏韻

餓隸宵分也醉譁朝衣日久豈堪誇老松孤影原無藉
小草陳根自有芽清晝杯柈還濟楚隔宵書卷任欹斜
百弓新闢寬閒地好種人間第一花

輓蔣母鍾太安人

小子幼失恃不知慈母恩聞人述母德未語聲已吞懿
談太安人閭範衆所遵豈惟作女宗矜式周簪紳我友
蔣太史蘭譜旣夙敦每於賡酬暇爲言慈訓諄終身母
爲師講貫無朝昏立身視道岸讀書味義根窮達付之

命毀譽聽之人所貴植骨幹七尺撐乾坤我每奉斯言
寤寐鐫貞珉屈指數年來拜母入寢門飲食兼教誨一
一承慈溫有時率子婦歡然來過存相視如骨肉異姓
作弟舅蒞蘭與佩悅投遺何紛紛同作萍梗客翻若朱
陳村江城獻歲後庭梅敷早春開筵召會食芳醕盈清
樽握衣揖慈闈笑語謹諸孫預計桃杏時板輿出近闕
兩家萃婦孺同嬉春水濱如何甫隔夕遽聞返其真無
疾而速逝應自了夙因吾聞至人言死生猶屈伸德福
亦旣備哀樂何足云太史有家述典型詒後昆虞初採
軼事庶幾知所珍

癸巳仲夏吳門喜晤汪訥菴員外卽招同蔣芝岡

觀察李

褚

兩明府雷松舟二尹蔣香

涇進士程東沼孝廉項石友上舍泛舟虎邱夜

歸

具區新漲添深綠
菴岼柔波浸山麓
柁樓斜日綺窗開
隔船喚到人如玉
簫聲水面清且圓
小部家伶載一船
名士愛爲甘蔗舞
老夫亦有柘枝顛
列舸開筵明畫燭
宵深更泥吳娘曲
笑牒言鯖雜遯來
魏三張八兼生熟
栖屑天涯良聚難
請君披腹呈琅玕
當歌對酒意氣盡
今夕何夕樂未殫
酒闌霑醉更浮白
主人小舟能送客

山塘風雨忽驚人急槩迴波轉欹側企脚篷窗且浩歌
高城魚鑰定如何金谷詩篇自不易漢陂哀樂何其多
和程東冶詠物詩四首卽以奉贈

落梅

不惜地先委獨憐香已塵但留空外色誰證夢中因冰
雪感前度烟霞多故人讓他桃李伴穠艷鬪三春

新柳

爲得陽和早先屯曉岬烟看來眞濯濯挽去已綿綿綺
日精神好柔風態度妍殿前移植後休負冶春天

睡燕

飄泊亦云久空梁纔穩眠卑棲殘影怯舊境斷魂懸雨
過巢初定春寒夢未圓那堪頻喚起學語傍人前

流鶯

已切惜春念更兼求友心如何聲嚦嚦猶隔影沈沈三
載且幽谷一飛應上林金衣相對處斗酒試同斟

山塘讌集分題二首

芡實

纔見翠盤出旋看珠粒融夢留雲水外香在豆籩中結
實三秋滿勺圓萬顆同雞頭新剝後眞羨野人風

桃

瓜李浮沈後佳名愛膽之得來豪已足投去報休遲雪
黍邀同輩看花訂後期肯供臣朔飽不惜牖中窺

又分詠樂器得檀板

何人工伐檀製器不盈尺裁茲片木植貫以絲繩赤其
形長而方其數雙復雙聯絡相合離中有隱起脊相推
更相敲利以左手搯羯鼓與之偕急響拍復拍條理旣
秩如衆音乃翕繹樂句問老伶爲我講且畫

贈泰州牧王介巖

名錦山陰人

海雲黠黠海月黃海陵城外飛微霜新堞齒齒排女牆
中有召父仁且良噢咻善政周寬鄉一號一令罔不臧

冷宮沿牒來文場束帶不慣工趨蹌倒執手版綴末行
有如逆毛風中鷓鴣聲中夜來客牀驚起捫壁喧塞裳
客座假寐豈敢違脣乾口燥空徬徨紗籠熠熠肩輿旁
當階乍聞聲引喤衆客起立排堂皇主人執手情周詳
盞簪列炬何輝煌傳呼茗卒羅酒漿烹鮮燔炙包羔羊
水引之餅調羹湯當筵馥馥聞殊香菜園踏破撐枯腸
露醉仰看明星光樂莫樂兮未遽央蓼蓼騰鼓催人忙

雨中感懷次胡杞塘韻三首

衰年心事久如水懶向紅塵走鬱蒸警露肯忘棲柴鶴
得霜甘讓縱絲鷹已看腰脚成如許休問梯枕更幾層

一樣浮生寄秋水莫將新艾傲枯菱

積雨苔痕欲上階荒廚那得酒如淮
千絲婀娜長亭柳
隻影於嬾小市槐敢以墊巾誇有道
但將高枕學無懷
秋風歸計吾先決只欠登山一緇鞋

落照牆根送晚晴濕葵無力尙心傾
草間誰聽孤蛩語
雲外空留過鴈聲羸馬豈堪仍遠道
閑蛾偏自戀長檠
西山一角濃於染朝爽看來定有情

題瓊花觀圖後

吳公堂下春晝長蕃釐觀裡瓊花香
司花來夢各有職
是花是夢終茫茫春波殿脚千人到
獨見瓊花迎輦笑

一夜仙姿歸太清二分明月空相照古觀頽檐日易斜
洞房琳碧鎖烟霞井中仙客不可見街上老翁猶賣花
繁華轉眼成灰冷鐵獸門前弔孤影但聞人語怨高駢
那識鬼書留趙杳太白陰經標綵箋綠衣韋郎長少年
歌吹竹西多夜市幾人曾到玉勾天

勸管平原開畫戒分韻得三江二首

知君能事本無雙偶矢前言折慢幢少日零縑珍共襲
老年健筆鼎須扛道心綺語還難戒禪繪魔天怎易降
且請解衣盤礴羸閑門一爲寫春江

金壺盟汁注深缸爲拓長箋闢短窗乘興好堆山沒骨

多情更補樹空腔。定教生面傳千載。豈止佳名著一邦。
明日有人持絹素。打門莫厭惹花尨。

贈官霜橋

操筆何殊南面尊。書成千古守長恩。殺青應罄南山竹。
浮白須傾北海樽。荒徑忽來名士屐。春風乍到冷官門。
漫勞垂訊焚餘草。一笑寒灰不可溫。

得汪西顯書並承以王磨徵遺稿雕本寄示作此
奉答兼懷江玉屏

雲將遇鴻濛。數言一覩隨天風。盧敖逢若士。九天掉臂
空仰視。人生萍蓬羣。合還遠離一食未飽長苦飢。何如

爾我本未面只有慕想無愁悲我生奔走老湖海袁兄
灌弟幾人在不見西湖不見君彈指風塵十餘載手把
瑤華重太息千里關山莽無極我齒缺落君眼昏他時
相見詎相識故友遺編校錄成知君生死重交情我有
同心寄天末不知誰更客邠卿

祝吳並山五十

會集瓊爐感歲華一樽相勸莫長嗟最堪暱就惟冬日
大有奇觀是晚霞雪後人山還駕鹿春來乘雨便栽花
明年翁子長安去可憶寒蕉石徑斜

並山四十余以五十祝之昨晤言始知其誤因再

獻此詩

莫言歲暮孰予華介壽先將學易加本以書碑訛碧落
翻因畫日襯朱霞知君卽露懷中綬笑我能添錦上花
措大關心未來帳尋常酒債慣須賒

江賓谷以韋蔣仙所作梅花詩索和予愧不能繼
組聊以長句答之

江君手持梅花箋向我朗咏梅花詩云是黔中開府作
寄來遠道當和之我讀此詩三太息作詩年月我猶憶
翠螺山下風雪中獨對冷香倚頽壁一自梅花好句成
離宮獻賦入瑤京視草幾年直

祕閣探花一旦冠羣英從此城南天尺五轉首儀同更
開府夢裡殘霜路未遙鼎中餘瀝人爭取今花昔樹滿
揚州記共木蘭僧寺遊舊句紗籠不知數那能一一追
相酬遙知今夜庾樓下幕府多才和者寡倘教馬磨老
文休誰向牛宮尋季野君不見水邊籬下影橫陳各抱
幽香各有春東風隨意便吹去幾片飛來上錦茵

送袁春圃觀察遷任雲間四首

疊鼓凝笳渡曉江海門晴日照輕艫開函瑞鵲仍雙印
常鎮管揚關松太管海關皆佩兩印公言自歷任遵渚
臺垣以來必兼兩職平生仕宦無有不佩雙印者
翔鴻又一邦樓聳千叢援斧繡泉騰五色迂旗幢津亭

耆孺知多少競戴香盆傍水臚

瑤島澄波靜貝宮海濱人識鮑家驄六條共凜

黃麻詔三柳先盟白水衷翬錦家山看漸近春臺民俗
喜相同扶桑絕域來寶幃萬里帆檣舶趁風

鈴閣香清燕寢閒潮音鐘響有無間傍湖鱖菜通魚市
近郭村墟掩鶴關人物定堪求二俊烟波應更指三山
枝官不爲牽柔柁一棹松陵自往還

幾載膺門幸撇裾郢斤偏顧道旁楊鶯花愛與幽人共
金庾慚叨烈士如畫舫笙歌頻載酒冷齋風雪慣停車
一杯江上他年夢說士難忘是本初

題宋瑞屏磨蟻圖小照

我生半世輪蹄中壯年轉徙隨飛蓬
入上燕京三入越齒落面皺成衰翁
年過五十忽繫柅卑官偃伏江之汜
羅雀門庭一事無反鎖衡門飢欲死
憶昔結客少年場司馬衣裘陸賈衰
豈知垂白如乾蠹肉生兩髀雷鳴腸
我有片疑爲君獻莫聽杜宇枝頭勸
天涯雖未金繞身故里更無人裏飯
君不見長安道上人如梭朝朝戰馬
更鈴騾勞人莫怨磨上蟻書生肯作
籠中鶩

送懷孟余月村之秦州

鈴騾戰馬津亭曙不許江春留客住
少年心事眞如雪

六千里外揚鞭去去年風雪倚江樓悔作江天跨鶴遊
誰信客游仍更遠揚州一夢便秦州鳳林川繞金微北
此地秋笳聽不得高柳叢篁好驛亭知君援筆多蕭瑟
君不見高生觸熱向武威鞍馬有似幽并兒文章但得
江山助關隴何辭登頓疲征途努力從茲始健翮圖南
應萬里莫倚飛騰少替人還須束縛酬知己絲楊濃綠
廣陵城離思冥冥陰復晴皖公山色不可見杯酒勸君
君且行

次韻訓洪植垣二首

歸夢知君傍阮溪天梯幾道白雲齊新交市上誰投繯

舊業山中好斷壑客路又尋江渚北秋心漸見斗杓西
近郊借得攤書地凡鳥門前不敢題

短檠孤穗耿銀荷抱膝空齋獨嘯歌敢厭爲儒官獨冷
尚餘閒字客來多雲知入夜先成露水到當秋自灌河
努力拾青年少事看余吟鬢已雙皤

慰管平原悼亡

中庭冷色自交加忍對空牀度歲華才子慣教吟柿葉
詩仙又遣伴梅花知彈別鶴心先碎欲問綢繆路已賒
莫向畫圖頻喚取絲灰新釀更誰家

東臺曉發

于役貪程早扁舟急遡風一天霜月冷萬里海霞空斗
樞頻瞻北川流只向東不堪蕭瑟候曠野聽哀鴻

聞淮決

傳聞淮水決已到楚州城遠道川涂失卑居性命輕分
離何倉卒流轉太縱橫側想清江口金堤未易成

過羅氏小園

小園依曲渚斜日冷苔磯地僻門常掩秋深客到稀霜
風鳴野澤海日散林霏一磬松間出鄰僧定早歸

舟中卽事感懷

寒烟漠漠水迢迢海溼窮秋倍寂寥儉歲魚鹽歸市晚

野田鮭菜入舟遙長天斷鴈難遵渚殘夜荒雞早伺潮
孤枕誰憐行役客授衣時過未停橈

贈東臺王

玉成

明府

吳陵依海濱東偏尤繁庶場竈相倚薄溝塍自環互居
民十萬家曠畛儼基布雖無城郭雄實有金湯固州牧
居其西鞭腹恐難顧

九重可吏奏割半立治署厥名曰東臺淮海資扞禦

天子曰疇咨此事非細務始基苟不善如器先壘窳安
所得良吏善政使首布是時逢大需一疏銓政淤妙選
孝廉才俾展經濟具英傑黔中來高振西雛鷺

特簡居是邦簪納慶榮遇有如作巨室四壁甫設度又
若墾荒菑畋水方入堦禪門重初祖此擔未易負先生
經術儒吏事乃餘緒持躬等圭璋拊民若嬰孺鉅規旣
已呈棟梁庶不仆報最書上考治譜人競慕詎止徵三
異實足歌五袴今年偶旱儉憂禱煎百慮乞蠲復乞賑
一一爲民頷敢言小災疹視若非肺腑以茲撫綏恩頌
聲滿中路恭愛浹民隱豈以求聞譽生平讀書效今日
乃有據愧我迂鈍姿循檄此輒駐趼足走荒墟蒿目對
瘠簞頻年鮮蓋藏一旦失豐裕苟非慈母仁失乳誰爲
哺小舟泊寒汀漁火明遠澈中夜不能寐起視海天曙

援筆成此 卑非敢諛 召杜他年 成志乘庶以備掌故

輓方

敬泉

酒船列炬 似將滅客船檣燈 獨高揭醉中一揖向河干
此是與君爲死別 前日捧君書一紙 書中言病無端委
沈臥長安 秋雨時誰爲量藥 誰稱水老母朝朝自倚閭
可憐猶盼泥金書 早知遠遊遂不返 肯教輕放太真裾
桂子不到方干墳 宿草年年血淚新 下泉知己亦未易
莫向鄴都頌帝晨

輓吳二匏

無諸臺上秋雲曙 江州司馬來何暮 萬里關山捧檄來

誰知卽是修文路當年作賦獻明光驚人意氣何堂堂
十載中書老而禿空教旅殯栖巖疆溫序歸時應有恨
此身悔不天山遯陟岡陟岵自長嗟吟魂血淚秋原噴
去年機棹把深卮今日臨風揮涕洟安得乘車將薄笨
撫君十字斷腸碑

贈臧蔭棠

蔭棠名開士字費男與汪兆宏劉長慶
韋佩金袁兆麟劉成基劉碩基同請業

於余是年甲午臧
汪韋三人同捷

昔我初交時考業招羣英經義數百卷惟君明且清日
與君共談奇才真縱橫去春約儕伴下帷求典型老馬
豈識途認許爲良矧五日一課藝藝成匿其名我必識

君作自詫目有睛虎氣旣騰上雄飛必先鳴七人作者
數二人病不行五人戰衆敵三人奏凱成我聞展齒折
此真制勝兵明年策東堂發言益粹精當抒第一義獻
爲雅頌聲季冬不覺寒風日暄以晴好牽孝廉船揖我
且北征

贈汪荇村

荇村名兆宏舉
後不試禮部

汪子悄悄真大雅讀書味義交游寡掃盡羣言探奧精
劍在夫襁金在冶寂寞春風揚子居問奇叩戶一載餘
果然至寶人共識有目豈肯捐璠璣計偕滾滾京華道
塵滿征衣日杲杲君獨閉門仍授經江梅寒沁書牕曉

靜者神全躁者疲豹隱七日宣終飢知君養晦有深意
省括千度當忍之

贈韋靜山 荇仙之子

江城日落寒鴉棲一燈短焰頽廊西叩門剝啄者誰子
氣驚戶牖垂虹霓孝廉之船公子衣光彩煜爛騰荆扉
冷官那得有此客隔牆鄰叟詫嘆歸官梅花開春今早
送君便上長安道述德真爲忠孝家論才不愧科名草
憶昔咏蕉騎竹時石麟天上人稱奇男兒福慧自有相
雲路豈容他人馳明年淡墨標第一玉署庭階看接迹
泥金馳報向牂柯爲道故人頭盡白

時荇仙總藩雲南

楊詩金 卷一 二
題汪少岑雪夜試茗圖三首

地爐煨榾柮活火焰騰騰應勝天山下人持一半冰

曹植馬前漠漠謝莊衣上紛紛何似茗柯妙理今宵獨
建湯勲

苦苺濃煎夜獨嘗莫嫌風味太蕭涼難求銖纈與星火
何限人問周子桑

乙未三月晦日招集同人於冶春詩社送春分得

柏梁體

三月三十風日酣遊人不減三月三冶春詩社紅橋南
森森萬木屯朝嵐我友羣集喧盃簪老者鬚髮垂盤髮

少者裘屐紛綸譚爲愛蒲供來精藍更浮桂檝尋幽潭
霞思雲想增狂慙大家新論徵桓譚不須薛滿兼何戡
吹絲彈竹矜咕喃我有懷抱七不堪壯心已作僵後蠶
但逢花月擔一甌高興便欲忘寢寢況有勝引皆僑郗
如對玉敦擎金盃朋簞分體隨所就短長不論鍼與鍼
各淬利鐸磨精鐔隴廉隨奴我獨慚聊復一作海棗談
醉中暮鼓聲齟齬催春欲駕驪駒驂我本於春無所貪
且謀結夏老學庵梅雖已標葛自覃

潘雅堂招集懷圃看牡丹

可喜故人子能交前輩人每於文酒地彌見性情真小

圃初開宴高軒恰駐輪

袁簡齋太史適至

羣賢欣畢集嘉卉競

紛陳雨氣重簾靜冰姿一朵新不同凡豔質宜與縞衣
親蘇鶴知何處潘花又此辰鄰牆休弄笛醉裡正沾巾

璉孫十歲詩以示之

十年前事夢中忙得第生孫共舉觴久愧一官看汝大

乍驚雙珥列吾旁

謂次孫適生

少儀講後宜勤習爾雅篇終

勿遽忘詒厥他年須假手老夫詩興漸頽唐

次韻祝吳底山壽二首

花自幽香酒自清東籬應不負泉明何須入外方休老
但得環中便養生眼底烟雲皆倭侶筆端風雨每爭鳴

祝延愧乏新詩句險韻酬來字屢更

知君萬事本由天爛醉狂吟四十年臨帖非關謀乞米
把竿聊復學烹鮮庭前慣設看花局屋後閒鋤種芋田
真率會中皆老輩陳遵肯許便輕旋

棕亭詩鈔卷十三

全椒 金兆燕 鍾越

哭趙璞函兼懷王蘭泉

歸來溫序只吟魂蜀國哀絃不可聞

天子籌邊非好武書生死事坐能文香名海舶騰詩價
毅魄蠻天作陣雲回首可憐征戰地仲宣猶自賦從軍
過隨園謁袁子才適值其楚行未歸二首

三年不見鬱離愁急叩通明最上樓豈意閒雲偏出岫
空教老樹獨吟秋家童已許穿花入遠客何嫌冒雨投
排闥笑呼同伴坐此身真到鳳麟洲

知君杖履本無愁肯爲行藏更倚樓
小別蓬山應記日獨尋林屋最宜秋
人間未覺金貂貴此地真堪玉燕投
君昨歲初舉一子一棹湖天看日鷺
定知歸夢在江洲

題韓江雅集諸公詩冊後

味江山下唐山人一瓢身後終沈淪
昌谷山中李長吉錦囊廁裡半遺失
惟有香山之白彭城劉龜兒編勒崑
郎收不緣後人善攜拾靈物持護空
鬼謀邗江詩人今已矣雅集諸公存
者幾吉光片羽宛然新不共寒潮落
秋水我捧是冊循復環讀十日門反
關乃知前輩足奇氣隻字長留天地
間

周孺人哀辭

陸豐縣黃沙坑巡檢嚴樞妻持夫喪歸浙以毀殁于廣州

颶風獵獵吹銘旌海氣蒼蒼黃沙坑猿啼鶴唳不知數
湘娥一哭枯湘莖前年捧檄隨君至回首白雲空制淚
今年萬里持喪歸衰麻何以瞻庭闈升車三號不我應
赤口炎炎心恹恹含悽顧視膝下兒我欲離魂相與併
一宵旅殯兩黃腸風雨羅浮路渺茫到家莫更悲溫序
入室依然對孟光

汪師李和拙作見寄並貺以九靈山人集丹鉛總錄龍井新茶再疊前韻却寄

小水何須泛大樽虛車敢便飾輪轅碧天聊綴秋雲薄

白髮難瞞曉鏡昏瀟灑茶仙愛常陸紛綸經笥仰樊孫
一編一梳皆君貺千里音書抵面論

興化徐孝子詩

揚州孝子蕭與任刲肝奇事傳至今興化乃有徐孝子
母病醫母醫以心孝子之心肫且誠起死絕勝參與苓
取心奉母母已活真心自在兒還生兒心母心本爲一
生機一片相益溢我謂滾滾世間人只有此人心未失
孝子孝子徐萬侯無心一世惟操舟可憐白髮鰥且老
終朝孤影臨寒流我爲作歌感以愴此心耿耿誰堪傍
千秋止有安金藏

陳蓉裳以詩見懷次韻却寄四首

落花飛絮曾游絲憶事懷人惹夢思乍喜魚書來遠道
更勞魏管寄新詩風前暗誦循廊久燈下長吟掩卷遲
蘋滿汀洲春水濶倚欄應遍碧苔湄

酒冷香銷話夜分蕭齋憶共理籤芸乘船夢日知紅近
攬鏡吟霜歎白紛塵壁尙懸孤館榻墨痕休浣舊時裙
撩人最是雕陵鵲感類難留逝翼殷

征衣皺縠稱身裁異縣飄蓬莫怨猜仙窟定逢修月戶
堦牕爭選抹雲才千人石上紅樓笛七里塘前綠舫杯
聞道近爲臯廡客月明誰伴上蘇臺

憔悴相思我慣經
聲聲檐鐵傍疎櫺
室虛莊叟夜難白
柳學王郎春又青
頻爲新鶯謀錦樹
獨憐老鶴閉柴扃
鮑家詩意終難會
一體如何判二形

題申孝子傳後二首

三原申汝德事繼母以孝聞
張秋芷給諫爲之作傳索余

題之

丙舍雲深護夕扉
終南山色碧成圍
春冰未泮魚先躍
曉露初濃笋正肥
千載門閭標綽楔
一林花樹效斑衣
未酬織屨輕除服
何限長安翟子威

慈竹春陰蔭屢移

兆燕兩
事繼母

斷腸偏露少年時
枯魚已盡

梁間索焦飯空留釜底炊
十畝荒邱星壓腳
一官冷舍

雪盈髭季姜殘帙添新冊觸迂王郎老淚垂

題陶素堂表弟對菊圖二首

三徑黃花六枳籬秋聲今夜到茅茨南山處處悠然見
只惜孤雲出岫遲

高風千古傲羲皇豈爲糟邱戀醉鄉試看黃花矜晚節
獨於霜後見孤芳

問鶴

春日以鶴贈傳宗上人夏與客泛舟湖上因問
鶴焉客遂分韻作問鶴詩余得煙字

自與我鶴別思之常惘然亦知得所歸飲啄全其天夢

寐終不釋乃復披湖煙禪堂午磬寂僧出尙未旋藉汝
守柴關驚見衣蹢躅毛羽倍修潔似得清淨緣若非依
禪定安得此靜便願我如欲語傍我相俄延懷舊情所
同安得不汝憐

江鶴亭新得康山招飲率賦

揚州城中朝市喧朱樓翠閣相連延培塿撮土不可得
井中鬱鬱徒觀天茲山秀絕人不識單椒匿處城東偏
間閭闐闐相匝匝如鳥在笱魚在筌康子遺蹟漸泯沒
董公妙翰徒高懸故宅易主已非一勝地待人斯永傳
羨君獨有買山癖願我始獲登山緣山入君手面目出

君得山助精神全
疊石爲山護腰膝
起樓爲山增肘肩
佳珉古碣嵌山腹
奇花異卉棲山巔
一日不陟山頂望
曠睽兩目興索然
一日百遍山徑走
蹠蹠兩脚如飛仙
日日招致愛山客
笙歌如沸酒如泉
名流麗句張滿壁
各與山勢爭飛翬
我有故山歸未得
山遊幸復隨羣賢
詩成更倚山樓嘯
白雲紅樹紛來前

康山讌集次袁簡齋太史韻八首

坐對名山列綺筵
籬花爭豔暮秋天
百年傳得詩人宅
先把黃金鑄浪仙

近郭遙峯左右當
帆檣歷歷遠天長
女牆穿過疎林外

放出殘霞襯夕陽

山腰奇石最伶俜
矮作闌干曲作屏
選得雲根坐吹笛
新聲分與萬家聽

惠郎中酒眼波斜
一曲清歌遏衆譁
安得將身作么鳳
香叢長伴刺桐花

樂府康王迹已陳
無邊風月又重新
若教喚得詩魂出
定許張衡有後身

自笑衰頽對酒翁
酡顏也學拒霜蓉
少年莫漫誇腰腳
黃海曾登六六峯

霜滿高城夜漏遲
爐煙尙裊篆絲絲
只愁帶月歸家後

處處亭臺費夢思

不論霧夕與霞朝從此登山勝看潮
千載琵琶腸斷曲吟魂今日爲君消

題江鶴亭秋聲館

鶴亭主人新構成高館獨以秋聲名
森森碧梧排直幹鬱鬱翠竹交疎莖
開軒正當八九月秋風忽聞三兩聲
滿堂坐客慘不悅揮杯相顧心神驚
白髮已感年歲逝黃葉况向庭階鳴
老夫大笑撩衣起且請諸君各洗耳
人言秋聲聽者悲我聽秋聲獨狂喜
農稼旣穫慶有年役車將休得歸里
大暑已過寒未來高天淨爽無些滓

譬如壯士乘良時精神振刷百事理梧聲竹聲何徐徐
一片笙簧似步虛仰看星月夜未半且與歐陽共讀書

江玉屏以人日新作見示卽步元韻代柬招爲燈

夕之飲

花前鼓三撾月下笛三弄衰顏得酒和暫一釋梨凍君

才富逸藻不竭隨所用竹林旣把臂倡和有羣從

謂令叔橙

里令弟習隅

而我傷秋特吟席無與共所賴素心友詩筒屢

郵送身如不繫舟心似全枯葑不有良會樂詎得豪情

縱來朝休蹉跎去日已倥傯折柬招叩須致書心鄭重

燈夕招江玉屏共飲不至次日以集晴綺軒詩見

示卽步元韻奉呈更訂後夜之約

花下掃花人月中修月戶課程無了期勲伐何由樹自
知坐談客勿復占巷遇眼中人已老掌中杯宜覆將埋
都亭輪安問望皇履詩壇旣多羣酒國聊共寓前日招
君飲君乃不我顧座上無車公滿座盡少趣知君多內
集少長同潛酌我亦久開尊家釀足傾注近局相往來
彼此無數惡連宵月未虧影燈亦堪賦人生過半百駒
隙已漸遽况乃多憂纏會合安得屢天須補其穿景定
可再駐明夕望君來更掃門前路

十四夜集飲吳梅查卽席成詩見示步韻奉酬

火樹冰輪此夕兼流輝交影敞虛檐三更歌管猶留客
四面軒窓盡捲簾杯底莫教辭魯酒鏡中已是滿吳鹽
良朋佳會人間少欲買燈宵幾度添

祝田鴈門八十

鴈門先生不可及行年八十如四十游龍健骨雲端翔
老鶴長身霜下立城隅習習落燈風寒勒梅梢未肯紅
野日初晴遊騎少早逢杖履畫橋東杖履相逢成一笑
君真不減狂年少挈榼提壺盡後生婆娑一老偏同調
君言昨歲病中時豈意今春復在斯良友自沾延壽酒
老夫只當再生儀我謂先生倉扁侶遐齡從此方堪數

生平何限活人方晚歲且爲如意舞我齒小君二十年
羨君矍鑠如飛仙他日向君拜百歲八十老翁應可憐

寄吳穀人

金霧溟濛繡作帷瑤臺空聽步虛詞日憐夸父終難逐
山笑愚公未可移露泣巖花沾曉淚煙屯宮柳鎖春眉
長門尙較天涯近休詠班姬篋扇詩

金斗歌

謝蘊山太守以典試河南鹿鳴宴金花製爲巨
斗席間出而飲客命余作歌

洪州地勢鍾人傑裔出謝傅之子孫弱冠讀書入中祕

木天品望清且尊

天子求賢重選士賓興三物典制存惟茲豫州崧嶽地
生申生甫古所聞

九重慎簡詞苑職提衡操鑒試以言我公奉命乘軺傳
三旬鎖院求國珍鹿鳴高宴領多士一一堪爲楨幹臣
花簪兩朶金葉重奇光煜煜如黃銀鋒車華館相照耀
臣心夙夜惟其實歸捧重器獻堂上雜沓賀者羣在門
公曰此貨誠難得宜作彝器銘

殊恩乃命良工製大斗入冶寶氣騰洪鈞傳之奕禩永
寶用如捧

繁詰欽

絲綸花前示我勸我醉益日其義不及賓手斟口讀詞
義古周欄四面迴波浪沾脣漬口謹再拜不敢濡首恣
鯨吞商盤孔鼎此其亞豈宜褻越頻摹捫歲時潔齋供
享祀子孫燕喜兼冠昏今夕何夕歌旣醉高甲況復傾
詞源祖珽帽中不可匿且賡巨製庶毋謾

喜晤汪草亭

爾我髫年友相看各老蒼謀身惟用拙對酒尙能狂好
下舊時榻休褰前路裳紗籠佳句在香繞谷林堂

集潘雅堂齋中次韻題張看雲畫

次閔玉井韻

空壁滂雲氣揮毫獨有靈山延窓外碧石映砌旁青便
足名金谷何須展玉屏主人眞愛客小室肯長局

次徐藝農韻

名園得早春疎梅已如畫更張煙雲圖幽思出詩外謾
謾生松風漸漸鳴石瀨常此供卧遊何必入林霽

次吳梅查韻

勝引集良辰促膝無少長萃茲金蘭契共作煙霞想空
庭春草生遙天片雲養更看壁上圖競致物外賞濃潑
更乾皴外潤而內朗高峰峙則劣懸泉亘瀆萍小室不

數弓疑有萬壑響安得泛一艇從此舉溪網只愁塵俗
客園綺不易倣但許對茲圖遙峰指三兩便足滌悵襟
與君祛曠快小園門勿局我欲常來往

次羅兩峰韻

作畫知君亦等身畫圖猶自羨他人壁間古懹堪爲友
句裡生香別有春魏管千堆應不惜鶯溪一幅更教皴
解衣盤礴真機出莫遣煙雲空際淪

次易秋澄韻

紙上如聞萬壑秋天紳百道向空流懸來高閣延賓侶
便作謝公山澤遊

次潘雅堂韻

滿堂讀畫皆詩客尺幅煙嵐生硯北書卷疑霑石氣青
簾帷忽罩松陰黑朝霞對我何軒軒知有天光空際懸
他時更泥看雲子爲寫庭中雙樹圓

再疊潘雅堂韻

滾滾作詩滿堂客詩壇鏖戰我先北吾子真令藍謝青
老夫且以白守黑諸公佳句無輕軒強韻一一金鈴懸
賡章獨愧車前果擲向潘郎尙未圓

次朱瑞屏韻題范芝巖邗江話雨圖

我生性癖愛結交良朋彙取如征茅平原慣作十日飲

那肯把臂旋輕拋前年甫得共君醉一矢已獲先聆鶉
昨歲聞喜更酣躍威鳳初搆丹山巢文河從此益濬發
瀆漩那許他人消今年旌棧更小住看花屢獲陪煙郊
朱欄紅藥競萬朵碧天丹閣臨干仞彩筆君眞照霄漢
春風我亦生庠膠所愧才力百不逮桑弧安敢儕犀朔
願顧珠襪結君佩願瀝瓊液充君庖汲引尙願井谷酌
往還詎棄愁潭蛟新圖一卷乍持示卷中麗句扶千苞
鐘鏞巨響旣迭奏微言乃復徵竿匏裂帛自知窘邊幅
難舒尺寸隨雲旂強韻一一苦踐躡不辭懸絙躋高梢
一時俊侶吳與宋淄澠判別誰能消圖中相對者誰是

濛濛煙雨浮蘆花高談快論人不識漁童荷婦紛相嘲
蓬窓促膝樂復樂美酒共酌飯共抄嗟余六十老而吃
欲鞭馬腹無長鞘安得膺丹一夕許共載應勝寒驢道
上推還敲

補祝詒有叔六十壽述懷

四十年前童州時一編几案同嚶吟靈運最愛惠連句

仲容亦賡嗣宗詩

癸丑歲先君子開家塾兆燕相隨叔父讀書

竹林忽聽驪

歌起燕山閭嶠五千里

叔父年未二十卽事北游

偶停歸棹返家園

白酒一壺鄉味旨豈意飛騰三十年叔安家食我風煙

關山南北顛毛禿骨肉東西屋角連卽今冷宦違鄉縣

十年不見親知面庭前老樹定如何
舍後青山應不變
忽忽光陰甲子週不堪重憶少年游
銅盤會食知何日
竹杖看雲又一秋作罷家書空太息
依稀記得懸弧日
前日秋堂忽夢君繞階猶弄魏郎戟

卜公祠枯枝牡丹次謝蘊山太守韻

春雨之後塗附塗繁葩芍藥間
文無滿目生意益百區
掃花日日煩仙姑忽驚異種忠烈餘
眵盱遺恨兼生枯
巖巖德性本自孤鬱爲瑞木根荄殊巧
風不得相吹噓
異質獨抱幽光舒千載毅魄此中居
呵護有若勤芟鋤
死生天地猶蘧廬正氣自有精光儲
人生萬事皆六如

誰枯誰苑真集虛

次謝蘊山太守韻送宋瑞屏入都

春風入夜吹虛檐高堂夜飲方厭厭四更山月橫冰匳
有客將發衰初嚴仰看星斗明樞鈴海天日出羣陰殲
孤青一點浮遙天衢隆棟爲君占執手且作片刻淹
北行我昔勞郵籤求針入海未易拈去冒霜雪歸觸炎
塵土撲面侵髭髯晚嫁寧堪儕麗纖鏡裡自惜衰無鹽
先生蕉境今方甜異寶豈久泥中潛魚腸淬後鋒愈銛
龍門回顧紛鱗鮎夕陽寒影棲棠隄三語此後懷阮瞻
邗溝淺水空瀼瀼自我識君心早收詩壇卓犖工飛箱

耽書嗜學太不廉
屈屐卷軸高齊檐
我慚庸學惟撻擿
敢復喋喋還佔佔
每於盧扁求針砭
支離擁腫不我嫌
朗朗懷抱同崔嵬
翩翩才調如丁規
巨室大木森梗枿
侏儒溝壑受職僉
明珠何以酬貂褱
安得終歲如蜚鸞
自昔杜牧與韋蟾
皇蘭從無荒徑漸
君才已似春渚蘋
君身肯作泥絮粘
熊魚雙味不可兼
分手請勿離愁添
木天他日眠青繚
掖垣花影清露沾
懷人應復攀朝簾

題汪起堂載酒聽鸝小照

憶昔從宦客海陽
山水處處供壺觴
接秀之橋西門外
絲絲煙水拂柳塘
是時君尙未弱冠
讀書已富曹氏倉

木言金 卷之三 三 貝言車
揭來十載居維揚君髭已茁我鬢霜潭裡船車何擾擾
紅塵插脚空奔忙兩城出入隔新舊過門不暇頻登堂
君擁三樂真常羊雙扶白髮綵袖香家弟已作華要郎
俊兄聲譽歌陟岡蘭芽新茁更奇異石麟天上標昂藏
聽鷗載酒足佳興知君所愛惟景光而我落拓猶江鄉
終日手板隨趨踰妻孥家養苦不足安得鼓吹來詩腸
披圖話舊坐深夜夢游已到新安江

呈朱子穎都轉八首

輦下聲名四姓豪傳家簪笏戟門高

清時碩彥羣推轂壯歲公侯早夢刀草野謳歌追召杜

廟堂籌策裕蕭曹東南筦鑰

天家重更向江濱一建旄

淮海波光拂曙開遙天紫氣自東來千秋樂利憑禹筴
一代文章重雅材竹素編摩懸日月川涂飛輓捷風雷
經邦有道徵儒術先遣和羹試鼎梅

井絡天彭鳥道懸憶曾辛苦事戎旃星流盾墨枚臯檄
雪擁氊裘祖逖鞭絕域倍增詩骨健奇才獨受

主恩偏全銷兵氣敷仁讓魯國諸生拜馬前

泰山梁父鬱層青清簟疎簾列翠屏千里洪波浮汶泗
三春佳氣遶云亭帷宮傍日排高嶺輦路依雲出近垌

天子入疆行慶遍早頒金爵到莎廳

十月冰霜渡大河萬家煙竈出叢柯舟車溢目豐亨久
水薤銘心淡泊多黍谷盡吹鄰衍律棠山堪駐魯陽戈
兒童拍手歡迎處來暮爭爲夾道歌

引隍衢路曉褰帷指點間閭認昔扉僧壁拓紗籠舊句
市樓懸綵迓新暉墊巾沽酒知何處解帶量松更幾圍
前度詩人今豸繡鬚眉爭識未全非

翹材新館傍雲涯門外方塘藻苻加多士文章披畫錦
使君意氣冠朝霞九原遺範師忠悃三物羣英蔚國華

自向講堂頻校課不教明月冷梅花

梅花嶺爲史閣部
葬衣冠處舊有書

院久廢公重爲
建闢課士其中

布鼓雷門未易持那堪舞鏡喚村雞知公說士甘于肉
笑我逃名聚以醯妄擬擲書當叔夜敢勞束帶效昌黎
牆根蟋蟀聞鐘籥聊向秋宵更一啼

看續芳園芍藥

愛花如愛書搜奇不惜心手劬好花如好色訪豔肯教
雲水隔昨日城北攬已周今日更作城南游出城喚渡
日杲杲爭渡盡是看花儔河干曲徑依稀在當戶古藤
屯綠靄藤陰幕歷牆玲瓏隔牆已訝花如海繚垣斜遶
赤欄行行到花前魂自驚金輪天上排千輻瑞日夢中

香入英淺深紅白宗生縵千朵萬朵看不足
駢枝並蒂各呈奇披煙濯露爭相續錦幔高
張列廣庭五光十色紛冥冥開到此花春力
竭春欲不去應難停我倚花欄頻岸幘花應
笑我顛毛白風前私語向花盟來生還作揚
州客

吳曉亭以詩枉贈步韻奉訓

先生高蹈人停舟偶憩此掉臂過豪門不肯
投名紙踏雪到冷齋欣言獲覲止傾倒胸中
書抨彈天下士學古得真師持論據獨是人
稱乖崖翁自號鏡機子杯酒氣益振古人少
可擬眼前昨暮見安足爲舉似聞昔王比

部穀原

與君室相邇斯人真天人惜哉今已死豈惟悼
龍頭亦自感馬齒人生過半百萬事皆可已安用車班
班聊曳舄几几白日寢已馳乃作發軔始人縱不我訶
我亦宜自耻君今返家園禽尚庶可比座猶留荀香書
更望遽使何日訪戴舟一問剡溪水

丁酉冬日程魚門編修以六十自壽詩六首郵示
余六十生辰適在除夕守歲不寐次韻寄之

祝延觴裡歲云除斟到屠蘇孰後余往事已迷三里霧

來朝猶挂萬年書

近刻時憲書
再遇甲子

葦莖插遍渾無謂苜蓿

餐來不敢餘獨憶酒人燕市在火城珂傘見嚴徐

木石言金 卷之三
噬腊何嘗盡得金肯將形役累吾心嬉春但選過頭杖
假日聊爲抱膝吟自信疲驚難十駕未妨朽櫟也千尋
百弓新種琅玕滿把臂誰堪共入林

黍麥低昂各有頭蟻封敢望鳳麟洲說詩斂手輸匡翼
傳易甘心讓賀讎寒柵露雞空照夜高墉霜隼自搏秋
他時下澤過鄉里不負平生馬少游

撫弦定必有虧成拈子難教泯讓爭但放眼時天自濶
不投足處地皆平看來好事多虛事悟徹無生是養生
匿影韓康休入市人間何得盡知名

敢矜邊笥腹便便飲鼠河流亦果然買菜市兒休請益

梳頭貧女若爲妍
當階淺碧春應發
閉戶遙青曉自延
從此陶情但絳竹
不須哀樂感中年

江湖落落平生友
項領紛紛昨暮兒
豈有文章同庾信
敢分主客效張爲
引年漫守庚申日
判歲俄驚亥子時
強韻壓成天欲曙
燭花爐焰總相宜

丁酉除夕

世事何分酪與酥
但求暇豫便吾吾
任他虛耗同爲照
笑我詭癡亦有符
一盞且謀傾繫落
五花底用上糶輸
十年舊夢空彈指
憶買扁舟上直沽

戊戌元旦

矯首扶桑麗日暹晴光煜燐布彤襜眼前六甲已全過
階下雙丁應可添未覺囊空留酒債聊因門靜理書籤
冷齋曝背南榮下晴日浮烘正滿簾

曹忍庵枉過署齋以詩見贈依韻和之

不問江頭繫纜磯一鞭飄瞥帶殘暉乍驚狹巷來雙騎
似獵前山更幾圍缸面臘醅花下熟溪頭春韭雨中肥
莫愁寒榻無氈卧尙有相如未典衣

五月十六日病中夢謁杜樊川祠題壁

罪言懷抱自千秋幕府聊堪借一籌禪榻鬢絲春又去
空將煙月老揚州

病中朱子穎都轉餽食物詩以謝之

伏枕空齋日已趨忽驚珍味貺來多聚觀且耐兒童擾
拜賜還憂禮數訛九轉飢腸抒軫結三旬皴面起榮和
良腴何限秋原草盡待慈雲散積疴

哭吳松原

五月二十日老夫病兼旬是日更綿懷伏枕頻吟呻似
夢復非夢見君漸江濱擘袂未移時白日旋西淪我時
屬向牀家人驚且喧瞪目燈如豆哽咽不得言異哉未
半月惡耗來遙聞君果於是時長逝無歸魂古人視生
死無異晝與昏解設而陳表棺復多逡巡獨悲曠世才

窮老空山春所學不見用一棺已戢身詩卷留人間
語何足存哭君還自哭君聞定悲辛而已返其真而我
猶爲人

題曹南臯所藏其先祖鐵船道人詩卷後

千秋萬歲名寂寞身後事一瓢擲向長波中若滅若存
何足計獨有慈孫孝子心手澤杯棬未忍棄縱然聲響
竟沉淪肯教簪履常遺墜拾來片羽光猶騰珍以千金
帚豈敝鐵船道人歸道山注籍已在方蓬間詩衢追步
有詒厥寸札寶護如環珊帽箱衣篋紅蟬走紙勞墨瘁
亦已久裹鹽覆醬幾度經到處似有長恩守文孫見之

捧而泣一讀一誥跪且立此是吾家琬壁與球圖不愛
珠琲百千玉珏十繡褫錦贖絲為欄精神奕奕還舊觀
文綾重裹錦帶束龍威丈人闕見難有時謝庭好風日
烏皮几上展緇帙滿堂賓客肅然興似檢異書入唐述
吁嗟乎裴家泉石魏家笏榮華轉眼成消歇數字長留
天地間頓令光彩中霄揭鐵船鐵船如有知自以精氣
常護持雲祇百世永傳襲生祥下瑞無窮期

棕亭詩鈔卷十四

全椒 金兆燕 鍾越

己亥元旦和唐鵠舉韻

隔日纔過覽揆辰

予以戊戌小除日誕生
去年戊戌十二月小盡

三朝令節便

相隣丁年空憶強兼壯亥字聊書首與身儉歲傾囊難
餞臘衰顏得酒也生春名園城外多新葺好辦歡游更
浹旬

讀張堯峰秦西塲唱和詩因次其韻柬示兩公

兩翁鬪詩強不肯一个弱百斛鼎互扛九天珠共落手
賽大小垂局爭先後着瓊瑤相報酬軒膾各咬嚼乘風

木石言金
一
羨雲將觀水驚海若百戰百回勝一日一竅鑿春花旣
翩翩秋星更作作蘊藉張九齡奇與李百藥乃知文字
禪盡解根塵縛而我本鈍根于今尤隔膜但獲壁上觀
已甘壘下却商鉅安可馳阜螽勉使躍此事真推袁吾
人且效郭人春已七日客思正如灼蕭條鶴在林局縮
狼處橐何意霜月夜忽聞邾魯柝首春風日佳大堪謀
飲酢詩朋聯新舊花事憶今昨且爲三人行勿坐十日
惡安能學子雲空亭守寂寞

元夕讌集贈雲軒分體得七律

濃雲解駁乍紛紛簪合筵開已夕曛肯散銀花惟火樹

最憐白髮是紅裙酒邊不惜歌千疊天上應添月二分
一笑廣文官獨冷瓊瑤何以報諸君

唐薊崖觀察招飲牡丹花下分賦

萬里事宦游三逕久此別甫聞繡衣歸早見綺筵設開
庭既掃除草木倍光悅勝引欣沓來外姻忝末綴名葩
耀華堂錦幙排緋纈色對酒人酣香入琴心潔倚石當
醉眠添籌祝大耋公所居堂舊名海屋庭前美人石娟妍可愛滿堂羅衆賓
盡是遂初哲林下談笑真花間性情澈況有孫曾輩一
一蘭芽茁從此文字飲不辭賓主迭所喜冷官閒未覺

塵纓紕

贈胡檢齋

文衡使者開旌門諸生鵠立如雲屯教官趨入東西向
屏息不敢相爲言長身玉峙者誰子奔走階前供指使
初試卑官職內巡早知幹局占通理使者退衙羣吏肩
鈴軒長晝風滿庭科頭促膝暫閒話塵土相逢眼倍青
聞君家傍蒙城住齊物逍遙應久悟誰共鵬鳩量地天
不妨椿菌同朝暮

次秦西巖韻送閔西軒之楚兼懷江橙里

我昔扁舟泊夏口洪濤萬里江聲走千秋才子在何處
鸚鵡洲前一搔首行人無恙出破冢布帆寒影罩虛隴

江上琵琶不可聽青衫但有淚珠湧天涯行脚訪南宗
回首黃梅暮靄封夢中歷歷舊游在何限關山衢路衝
此去知君客思稠舵樓吹笛過黃州翠館紅亭多水驛
曉風殘月數更籌待伴有人清且淑意氣狐裘同伯叔
燈下應看對影雙花間肯使持杯獨芳草晴川漁子家
烟波村畔足清華登樓莫更悲王粲作賦須教繼景差
尺書爲寄江橙里兩地相思同瀾瀾何日重爲解佩游
塵纓快濯滄浪水

鮑鸞書偕令子雙五過訪並貺佳作率爾奉訓

憶昔挾策遊新安巖鎮路口停征鞍潛虬山人意氣盛

新從閩嶠歸故山錦冊示我荔枝詠嶺霞海氣生筆端
分手一別二十載時時夢裡相往還東行真人白日駛
名家又見羣隨紀新駒項領久已成老淚縱橫不可止
千秋著述付名山三代箕裘喧錦里請看滿眼侈輕肥
幾人貽穀到孫子夜市揚州空糾紛何樓人語無定論
潛珪泥下不自炫光彩誰知席上珍榮名至竟爲身寶
富貴應須致身早白頭老子向春風事業空慚科上稿
綠楊城郭花冥冥野飲不醉還吞聲何日寒泉薦秋菊
一披宿草問泉扃

檄送諸生應省試寓居三官堂贈韓景湘道士

憶昔十年前沿牒來秦淮僦居武定橋我友讀書齋

謂吳

春

江古樹繞檐楹秋花羅庭階更與道院隣東西恰對街

飯罷每閒行談笑日夕佳君時初着冠仙侶四五偕奕
奕僞祿儔超然無與儕今我垂白髮萬事多所乖差肩
倚旌門仍與槐柳排所喜獲卽次仙局爲我開一室淨
無塵簫管閒樽壘以此滌俗慮庶幾得靜諧而我屢感
嘆怛焉忽有懷前者所卧廬主人已沉埋幻作達官宅
輿馬紛相挨老屋秋樹根曾覆掌中杯不知改築後亦
尙蒙滋培衣狗真多端木鴈寧異材拍肩且此日一笑
同洪崖

和張荔門松坪集康山贈江鶴亭韻六首

託根不信在廬闌夜半應聞響碧潺白練一繩穿樹月
青螺幾點隔江山已教遠浦呈明鏡更遣高城作大閑
試撥鵲絃歌一曲詩魂呼出翠微間

殊恩紀遍勒崇鴻萬丈榮光燭遠空勝地定超千載上
仙璫疑貯一輪中捫搜便得幽遐趣位置真推造化功
入座不知誰是客觴行無算樂無窮

傑閣唐梯碧蘚生高標萬卷擁書城天邊日月窓櫺過
簾外帆檣几案平五夜星河迎曙色千家砧杵送秋聲
行人共道江家宅竹樹池臺盡有名

康王樂府舞衣斑千古高風不可攀
黨籍糾紛成底事
醉鄉淪落且消閒
香名舊著原難及
廣廈新添又幾間
堪笑冷官隣破廟
日尋拳石上浮山

翰墨圖書未肯收
朝朝三徑待羊求
秋深得句還敲月
夜半聽歌更倚樓
沾砌露濃花艷艷
打窓風緊葉飈飈
嘉招快侶同沈醉
勝作雲山汗漫遊

花萼新詩誦幾章
弟兄才調重班揚
日邊影麗鴛雙筵
雲外聲和雁一行
江月依人懷往事
隴雲牽夢到咸陽
不須憑弔增惆悵
真率杯盤會正長

將遷官入都管澹川以詩贈別次韻奉酬

揚州花月地薄宦十二年論文皆徐幹談藝多桓焉何
哉或投曲辭濤亦投箋以茲娛衰老竊喜全其天幸免
坐堂皇案牘紛滿前亦鮮沿牒檄奔走困塵鞅鈍或笑
似槌直亦任如絃但願垂白髮長此守青瑣人間富與
貴過眼猶雲烟性甘錡處後力難鞭着先郎今博士官
壘鹽古所傳摩挲石鼓文考訂車攻篇閉戶足自適鐵
槌兼韋編何用持麾節廣廈張細旃萱草憂可忘青棠
念胥蠲柔若集翡翠深淵藏鮪鱸悟茲逍遙理安用悲
離筵感君瑤華贈青山同矜眠乃知良友懷在遠意不
遷清歌留行棹更招沈下賢

除夜飲施耦堂萬齋卽席成詩二首見示率次原

韻

一朝送臘卽迎春雪意先教紀令辰踪跡不須還憶舊
頭銜聊復更從新多慚幕燕纔營壘何意包魚也及賓
欲對梅花同索笑將詩時向畫檐巡

主賓相對恰成三

潘孝廉雅堂在座

不許懷鄉只快談綺歲多

情難獨守客厨有味竟分甘正逢狂侶愁先豁莫笑饑
叔老更貪側耳統如聽五鼓朝衫着罷尙餘酣

庚子元日雪中早朝次吳穀人編修韻

金闕鐘聲動紫微玉階寒色映

形闡

御簾開處祥光滿仙仗排時瑞葉飛千里纔拋婁敬輅
九霄旋拂謝莊衣趨踰自愧儒生拙也帶

天香滿袖歸

是日 賜宴 太和殿同疊前韻恭紀

恩詔初頒曙色微早陳華宴出

宮闈銅盤錯落東西列帔舞蹁躑上下飛珍果味分仙
掌露

御醅香八侍臣衣半生朝暮壺鹽慣今日枯腸飽肉歸

正月六日同陳給事寶所錢吉士慈伯飲施侍御

耦堂寓齋次韻二首

詩朋慣聚莫嫌頻
酒政雖苛敢不遵
新歲問年難諱老
隔宵紀日便書人
但持白雪招同調
應勝黃金繞隻身
知有少陵佳句在
獨容王翰願爲隣

蕭齋排日剪蔬頻
茹蕒應堪學蔡遵
酒共憎狂無酌我
官非愛熱肯因人
烟霞不改從前癖
歌嘯聊娛現在身
莫笑捧心無好態
東家掣本效西隣

都中晤吳鐵儂

冷宦頻年共一方
便將異地富家鄉
烟霞舊侶還重聚
塵土衰年又飽嘗
出岫羨君雲作雨
脫巾笑我雪添霜

不堪昨夜揚州夢猶是平山載酒堂

風箏

嗟爾原輕薄因風便上游
弦高天易聞綫斷地難收
蔽日曾無幾穿雲豈久留
賺他年少客翹首不能休

張大司成樊川先生以詩枉贈次韻奉酬四首

講堂新瑞紀三魚學舍奇書富五車
得向宮牆瞻古栢頓教寒碧愧園蔬

新詩濃醖勝春醪落筆真看五嶽搖
傍得通明叨十賚何殊榮錫受弓弔

都養紛紛錄與殮帶經千古幾人存
從知六籍皆有核

好與先生味義根

春風滿座自悠悠敢說南來有子游從此放心收拾盡
烟花更不夢揚州

張萼樓上舍屬題新居壁率賦以應

長安萍聚人移家等移竹何曾居求安但見隣屢卜去
冬我初來草草解囊襍僦居委巷中得樹便已足今夏
大霖雨階除水汨汨紙帑墮蒙頭土炕濕及腹不辭轉
徙勞更擇一枝宿有如鉅馳河豈曰鶯出谷新居羨君
家門闌頗清淑市近酒易沽徑僻書可讀朝披荆蘭衣
夕捧鹽齏粥循陔樂有餘何必羨朱紱前年文選樓揚

州觀芳躅聯吟展華牋酣醉傾醺醪本擬安樂窩長享
花月福豈意官職遷難使地脉縮人生區蓋間有欲難
遍逐所遇皆可安知足庶不辱歌聲出金石爲君詠過
軸

就館王詒堂編修邸舍施耦堂侍御以詩見懷次

韻奉答

賓館隣家只隔街不須囊爰費安排紙窓日暖當風捲
髣几塵清逐曉揩居向長安原不易地堪小住便爲佳
暫隨童子呻佔畢也對春風一放懷

耦堂寓齋夜酌卽席登前韻呈座上諸公

總騎歸馬過天街早見壺觴次第排滿壁華筵珠並燦
當檐明月鏡新揩客途正值春難遣酒所休嫌論未佳
但許入林同把臂何妨一詠嗣宗懷

耦堂月夜枉過兼以詩贈次韻奉酬二首

銀蟾一片正迎人滿室幽輝未覺貧半夜鳴珂驚鳥夢
九霄騰彩散雲鱗繡衣霜下才名重華髮燈前笑語新
我住巷南君巷北便成無着與天親

歌管隣家樂正航絲絲聲似裊春蠶誰從趙李當場醉
且作宗雷永夕談私喜蓬因麻裏直定知茶向薺邊甘
獨慚叔夜多塵垢難數平生七不堪

耦堂疊前韻枉贈疊韻訓之二首

臣今老矣不如人須達偏逢第七貧
失酒祇緣蛇畫足得書未免鯉傷鱗
青山夢裡鄉關遠白髮燈前客鬢新
薄宦自知難久駐敢言僮僕尙相親

卒歲惟將一卷耽送窮難似嫁金蠶
陶潛自昔愁形役劉表于今愧坐談
看遍唐花都是幻咀來諫果幾時甘
孤根移得江潭柳憔悴風前已不堪

同耦堂再疊前韻二首

詩園君真少替人撒珠拋玉不言貧
中達廣闊三三徑巨壑高翔九九鱗
火以屢傳重倍熾臺因層出色逾新

松陵唱和吾焉敢釣具金波庶可親

賡酬強韻本心耽其奈絲難續餓蠶但得杯傾燕市酒
何辭筆作夢溪談長源君自河添潤短綆無憂井竭甘
經笥書倉如可借也應致密問張堪

施侍御與陳給諫文謙有作索余次韻率成三首

奉呈

未得衝筵共醉卮也催覓句撚吟髭積薪豈復堪居上
華黍空教更補遺難判存亡凡與楚聊商可否惠兼夷
海棠花落藤花放除却前期有後期

瓦玉相看揔一卮紛紛爭鬢夢中髭江皇解珮誰堪贈

海上求珠定不遺客邸正逢天氣好花間真使我心夷

銷魂十五年前事衆裏驚傳揭榜期

時正禮闈試期

天倪和後任言卮不向人前更染髭我輩自能交有道
先生何必行無遺風前落絮隨飄蕩眼底長山自坦夷
沽酒尙堪動春酌杜陵應許共襟期

集韋約軒新居次韻二首

當筵同是謝家隣對酒何辭索笑頻偃蓋高松宜向日
移根小草也知春苦吟屢促酬佳句譚語還應恕醉人
執手長安多舊雨水萍風絮總前因

小石當階亦可攀峻嶒離立勢寬閒片時暫領南華趣

幾點驚看北苑山三徑人來花正發一庭晝永草同班
牆根竹葉休輕折未許扁舟便擬還

偶成

月在重霄珠在淵如何一樣論虧圓翠屏相隔無多地
簾永簾烘便各天

沈樹聲

母錢太恭人節孝懿行不可殫述嘗有句

云減膳朝供飯分燈夜課詩紀其實也余聞其
事作減膳分燈詩二章以俟採風者

減膳

今朝幸有飯不作無米炊且供衰年飽易忍季女飢捧

杜詩金卷十四
二
與
敦匱具饘粥二老歡然各饜足獨入空房自束腹

分燈

母縫裳兒誦聲琅琅虛窓共此衰燈光書囊筆牀箴綫
箱一篝相伴秋夜長他日華釭照甲第萊公堂上堆燭
淚牆角休將短檠棄

夏日都中雜咏四首

冰盞

午夢初回日漸曛聲聲脆響隔街聞宮商豈爲因人變
寒暑偏教易地分入耳乍如喧急雨醒心已似坐涼雲
吾生作事多無益莫遣盤中更鏤紋

涼棚

縛竹編廬似小亭全家借蔭此中停但遮東旭三竿赤
已失西山一角青匝地聽來何處雨遙天看得幾多星
憑他掣曳爲收放真悔依人傍戶庭

一竹簾

一從匏繫矮檐隅苦向烟波夢故居織得愁心當戶小
遮來醉眼隔窓虛逢人敢便分疎客入世惟知任卷舒
還許天寒依翠袖不辭憔悴到秋除

蕉扇

批風抹月野人姿難與羅紈共入時賣向九衢聲價賤

捉來三伏夢魂疲乘鸞那有雲中女撲蝶空隨道上兒
記得當時清露下一窓涼影綠天垂

同王竹所飲余月村法源寺寓舍

獻歲已匝月百卉猶枯荏今朝晴日暄九衢無纖埃吟
侶紛然至忍使便却回隣寺不數武禪關足松槐幸延
晷刻歡庶令懷抱開我本不佞佛而愛遊香臺譬彼駟
下駒土浴亦快哉明月旣已盡夜珠何處來秉燭且一
醉勿辭手中杯

次韻送吳鐵儂之官萬泉

人生馳騖駟車輪達旨誰能如崔駟驪歌一曲酒一巡

春風祖帳愁離人自我與子官相均槐兄橘弟情逾親
往往執手忘主賓知君胸中無點塵清溪鬼谷儀與秦
雄才世莫窺其津卽今牽絲初展綸纔如燭火閃一燐
已看百里皆生春我本棄物無與甄寒塘但愛縈波蓴
一朝誤別秋江濱霜風刮面皮肉皴梳裹不解隨時新
但以鈍拙全其真別君對君更愴神牽衣送君出城闌
從此獨客吟蕭晨舉杯空憶公瑾醇百梯山勢如哆唇
使君騶從何振振河流屈曲眼中陳飛泉萬道垂天紳
壺口雷首青正勾驅車直向大路遵唐魏遺俗頗足因
卧治不用嗟勞薪誰爲頓富誰夷貧沐以雅化皆堪馴

君去勿復爲我嘆我已悟徹身外身
庄伯之谷如可隣
便邀表聖同垂緡清泉白石應

中秋後四日同羅兩峯上舍程魚門編修汪秀峯

員外蔣心餘編修張瘦桐舍人施耦堂侍御集
飲翁覃溪學士齋中卽席題秋江蘆鴈圖

良朋集高齋暝色入虛室夢裡江南一片秋乍教移傍
詩人壁小庭巨幅爲橫陳俯首差肩聚看人昏眵老眼
喜雙豁此身忽與烟波親兩鴈相俛三鴈立一鴈孤飛
欲何適水邊葭菼自堪眠天外雲霞未可卽秋風瑟瑟
影修修舊侶相尋只鷺鷥正是欲歸歸未得衙蘆猶作

稻梁謀

同蔣清容周稼堂兩太史沈南樓吏部蘇方塘明
府羅兩峯沈匏尊兩上舍城南看菊分韻

西風撲面已微寒猶喜霜林菊未殘老圃班荆堪列坐
村厨採茹且加餐會聯真率人非易秋到蕭疎畫亦難
更約探梅還出郭不辭重戴共潘安

次李艾塘贈僕詩韻四首

天涯得僕便爲朋僮僇親書記昔曾驛路曉隨三尺劍
旅窓寒傍一枝燈雪山到處蛩依厯彤影多年葛附藤
木末水濱猶悵望可堪絙斷綵綵繩

久誦三畝賦七依郭郎捧劍肯相違
清晨換水先甌宰
午夜添香伴淬妃
緇帙虛帷閒共理
紗籠小巷醉同歸
忍教隻影孤飛去
塵滿征鞍淚滿衣

幾年同看

帝城春與爾相依
共一身富貴他時
惟憶汝晨昏此日
尙依人衾稠自卷
孤眠夢薪水誰憐
客况貧淒絕贈行
無長物腰間解取
舊時巾

別路分攜更苦吟
斷腸回首定難禁
三年五夜騷人淚
一片千秋國士心
雲水只今空獨往
海山何處覓知音
牀前馬後傷心句
爲爾孤吟感倍深

壽馮石潭因令子蘭洲遄歸寄之

坡公自別紗線街半生塵鞅走天涯
瑞草橋邊瓜與豆親戚情話何時諧
去年我暫歸鄉縣回頭似閃雲中電
令子長安賦曰歸歸途重整荆蘭衣
坐中客滿氍毹會爲我先看舊釣磯

題蔣仲和傳筆圖

范氏有傳硯柳氏有傳書蔣君傳一筆
珍重如璠璣乃祖拙老人翰墨與衆殊
手鈔十三經獻之

天府初簪紳獲榮觀慶喜聯華裾
晚乃寫此筆筆力勁有餘藏之冢
婦箱錦囊包中儲仲和方韶齡才已邁荀

謂萬卷溢几案八體工爬梳母也撫之泣祖德不可渝
此箠勝簾金汝其終寶諸仲和長跪受喜若奇可居奔
走齊魯燕什襲載征車繪圖索題咏再拜聲淚俱繩祖
既多愧事母亦已徂飄蕩逐京塵衆裡空踟躕何時揚
清風逸翮雲中攄老夫謂仲和子今方東隅年少謀致
身易如揮輕耰請君視此箠既疊還更舒努力念明發
瀧阡非妄譽

題乞食圖

庚市一朝能毀玉夷吾千載孰分金易京鄮塢知何限
金庾偏傷烈士心

贈醫者

我病忽如支離疏君術妙於徐秋夫不須箴灼苦竅膚
不用榻疋爲腦軀飲子一盞酒一壺蹶然而起推人扶
有此弟孫兼俞跗何慮戚施與籛條自從兩脚挿泥塗
未能得與先剝廬左顧無翼右無肱支左詘右張空弧
蹕蹕誰憐蘼足孤逝將腰鎌歸種蔬登山且佩谿落圖
超距更不鞠躬如遠尋日觀高石閭振衣千仞凌空虛
兩腋習習清風俱下視朽壤與塊蘇紛紛何異蜚推車
懷君笑作撮襟書書君名字雲中衢旣穿盤磴登危觚
足垂在外二分餘處身有若櫺栳拘憑陵大叫拍手呼

送丁玉華歸里卽次其留別原韻二首

昏燈夜雨乍新秋，明發聞君別薊州。
皖國雲山懷故里，廣陵花月憶前遊。
歸途車馬真輕健，冷宦琴書尙滯留。
惜別匆匆燕市酒，西風相對一搔頭。

蕭蕭白髮不禁秋，一錯何堪鑄六州。
君已穩收歧路淚，我猶狂作暮年遊。
書逢驛使須頻寄，花發郵亭莫更留。
何限緇塵京洛客，幾人真得大刀頭。

送張大司成樊川先生歸里卽次其留別原韻四

首

列子何須更御風，故鄉邱壑卽方蓬。
百年自得烟霞外，

三樂全歸杖履中不戀鶯聲惟老柳難忘鳳德是孤桐
可知朝暮壅鹽客珠桂長安未送窮

滿幅珊瑚間木難常容小子丐膏殘紅塵笑我閒中過
青眼知公冷處看未易一樽留李白最難三拜效方干
何時得傍香山社鷗鷺盟中捧敦盤

山斗榮光衆望歸何分雌伏與雄飛因緣自昔人難了
才命如公世所稀仙簪聲名原久著傳經心事肯相違
試偕童子尋遊釣新婦灘前有舊磯

到家袍襖正裘綿酒對公麟畫裡泉盛事堪傳千載後
歸途真妒一鞭先萼鱸斷岸秋風宅蓑笠寒江夜雨船

憶事懷人應有句莫辭頻寄白雲篇

得家書寄示臺駿

隔歲書初到新年涕一揮謀生知汝拙觀物悔余非對
酒空長嘆看雲欲奮飛庭花休盡掃待我共春歸

題王竹所北遊日記後四首

胸中指掌有輿圖眼底山川信不虛若使九州俱歷遍
定教筆禿等身書

蒲帆十幅曉風涼日日推篷紀載忙可有水濱閒野老
長途觸熱笑歐陽

川涂來往十餘通笑我勞勞似夢中悔不讀書先閉戶

烟雲過眼盡成空

長揖燕昭舊日臺
扁舟已辦水雲隈
可容借得此書去
展向篷窗倒看回

有感

青油幕下宣明面
黃菊籬邊靖節腰
燕蝠生涯原自異
人間何處不逍遙